

INUIT ATAQATIGIIT

Inatsisartuni



09.01.2019

UPA2019/48

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

FN-ip inuit innarluutillit pisinnaatitaaffii pillugit aalajangersagaanut Nunatta malitsitsinissaa qulakkeerniarlugu nuna tamakkerlugu iliuusissatut periusissiamik kingusinnerpaamik UPA 2020-mi saqqummiunneqartussamik Naalakkersuisut suliaqarnissaat pillugu Inatsisartut aalajangiiffigisassatut siunnersuut.

(Inuit Ataqatigiit Inatsisartuni ilaasortaataat)

Tunngavilersuut:

Naalagaaffiit peqatigiit ulloq 13. December 2006-mi ataatsimeersuarnermini aalajangersarpaa Innarluutillit pisinnaatitaaffiisa atuutilersinneqarnerat. Aalajangersagaq inuit pisinnaatitaaffii naapertorlugit aalajangersagaavoq. Tamatumani aallaavigineqarluni innarluutillit innuttaasunut innarluuteqanngitsunut sanilliullugit assigiinngitsutigut pisinnaatitaaffiit tunngavigalugit periarfissakinnerunerat, naak pisortatigoortumik innuttaasunut innarluuteqanngitsunut sanilliullugit innarluutillit inatsisitigut allatulli illersugaagaluartut. Taamaattumik assersuutinik makkuningga saqqummiussaqaasaagut: illorsualiortoqartarnerani innarluutillit, soorlu qamutinik kaamisartakkanik atuisut, arlaatigut aporfissaqaratik angalasinnaanissaanut periarfissaqartitaasannginnerat, naak illorsuaq innuttaasunut tamanut ammatillugu atorneqartussatut sananeqarsimagaluartoq. Tappiitsut isigiarsuttulluunniit ilinniagaqartut allat assigalugit ilinniarsinnaanngillat immikkut isigiarsunnerminnut tappiitsuunerminnulluunniit illersuuteqartinneqanngikkunik ikiorserneqanngikkunillu.

Nunatsinni innuttaasut ikiortariallit assigiinngitsut pillugit suliniutit ingerlanneqartareerput. Ukiuni kingullerni amerlasuuni isumaginninnerup iluani pitsanngorsaanerit politikikkut ingerlappavut, kisiannili inuit innarluutillit tungaasigut iliuuseqarnissaq suli nangittumik pisariaqarpoq. Innarluutillit Illersuisuat piffissami sivilisallaanngitsumi atuussimalerpoq, maannalu paasinarsereerpoq inuit innarluutillit sullinneqarnerat pisinnaatitaaffiisalu atuunnerisa nakkutiginerat qulakkeerniarlugu unammilligassat iliuuseqarfigineqartariaqartut amerlaqisut. Innarluutillimmi pisinnaatitaaffii tunngavigalugit aalajangersakkat pisortat pisussaaffigisaat arlaqartut malinneqanngillat. Tamannalu ernumanarpoq.

Taamaattumik sulineq aallartitariaqarpoq, taamaasiornikkut unammilligassat suuneri qanorlu suliat inissisimangersut malinnaavigineqarsinnaaniassammata. Innarluutillimmi allatuulli inuiaqatigiit ingerlanneqarneranni peqataatinneqarnissaat qulakkeerneaqartariaqarpoq.

Inuit Ataqatigiit tamatumani ilaqutariit iluutsutut isigalugit inuillu ataasiakkaat aqqissuussaannikkut iluutsutut isigalugit sullikkusuppavut. Tiliup innarluutillit pisinnaatitaaffii tamarmik malinneqanngitsut qulaajaaffigereerpai. Tamannalu pillugu nuna tamakkerlugu iliuusissatut periusissornikkut pissutsit ilorraap tungaanut sangutikkiartornissaat aqutissiuussiffigerusupparput.

Kaammattuutigerusupparput kommunit susassaqtartullu tamarmik iliuusissatut periusissiornermi akuutinneqassasut. Susassaqtartut suleqatigiisinnerisigut innarluutillit pillugit suliaqarneq qitiusumit kommunenillu akornanni innarluutilinnik sullissiniarnermut attuumassuteqtartut ataqatiigiissarneri qularnaarneqassaaq. Taamaalioornikkut suliniutit akisussaasut akornanni nalornissutaanatik ingerlanneqarnissaat pisinnaangussammata.

Inuit Ataqatigiit ilisimavaat, Naalakkersuisut pilersaaruteqtartut Inuit innarluutillit tapersiivigineqartarnerat pillugu Inatsisartut inatsisaannik saqqummiinalersaartut. Tamanna alloriarneq ajunngitsuvoq, taamaattorli Inuit Ataqatigiit isumaqarput suliassat inatsisiornikkut kisimik naammassineqarsinnaanngitsut, taamaattumillu innarluutillit atugaanik pitsanngorsaannissamut iliuusissatut periusissiorortoqartariaqartoq.

Taamatut oqaaseqarluta siunnersuut Inatsisartuni oqaluuserisassanngorlugu saqqummiupparput.

Pisortanut aningaasatigut allaffissornikkullu kingunerisassai:

Pisortaqarfiit tamarmik iliuusissatut periusissiornermi suleqataatinneqartariaqarput, taamaattumik susassaqtartut suleqatigiillutik ataqatigiissaariffiusumik pilersaarusiortariaqarput. Iliuusissatut periusissiaq saqqummiunneqannginnermini Naalakkersuisunit akuersissutigineqassaaq, suliamullu AC fuldmægtigip ukioq ataaseq sulinissaanik 500.000 koruuninik naleqartussaassalluni.

Nuna tamakkerlugu iliuusissatut periusissiaq aningaasatigut allaffissornikkullu naleqassaaq. Iliuusissallu annertussusaasa aalajangiisuutikkumaarpaa aningaasartuutit katillugit qanoq annertussuseqarumaarnissaat, taamaattumillu maannangaaq aningaasatigut allaffissornikkullu taggissiffigissallugu siusippallaarluni.

Namminersortunut aningaasaatigut allaffissornikkullu kingunerisassai:

Soqanngilaq.

Innuttaasunut aningaasatigut allaffissornikkullu kingunerisassai:
Periusissiornermisiunertarineqarpoq suliniutitnangillugit innarluutillit pisinnaatitaaffiinik atuutsitsinernup nukittorsaaviginera.